



KENYATAAN MEDIA UNTUK TERBITAN SEGERA • 28 OKTOBER 2020

Menentang Amalan Kesihatan yang Meragukan & Pseudosains

Untuk melindungi kesihatan Rakyat, Gabungan Kesihatan Malaysia (MHC) berdiri teguh menentang amalan kesihatan yang meragukan dan pseudosains (atau mitos perubatan).

Prosedur kecantikan yang tidak berlesen dan kelahiran dengan bantuan doula yang tidak berlesen merupakan dua contoh amalan kesihatan berbahaya di Malaysia. Contoh lain termasuk penjagaan pergigian tidak berlesen (seperti pendakap gigi, atau *braces*, yang dipakaikan di bilik hotel) dan produk yang tidak berkualiti atau palsu dengan tuntutan pemasaran yang tidak berasas (seperti suplemen tenaga). Bersama dengan anti-vaksin, perkara-perkara ini dianggap pseudosains kerana ia bergantung pada tuntutan ilmiah yang menyelewengkan atau tidak benar sama sekali sebagai alat pemasaran mereka, terutamanya di media sosial.

Kami menggesa langkah-langkah berikut:

1. Bahagian penguatkuasa Kementerian Kesihatan Malaysia (KKM) seperti Bahagian Amalan Perubatan, Bahagian Regulatori Farmasi Negara dan Bahagian Pengawasan Farmasi harus diberi lebih peruntukan, termasuk dari segi modal insan.
2. Suruhanjaya Komunikasi & Multimedia Malaysia (SKMM) dan Polis Diraja Malaysia (PDRM) harus menyokong tindakan penguatkuasa KKM dengan lebih aktif.
3. Peguam Negara dan Pendakwa Raya harus terus berwaspada dalam membanteras kegiatan kesihatan haram.
4. Parlimen berserta perkhidmatan perundangan dan kesihatan harus menggubal undang-undang baru yang sesuai bagi melarang amalan kesihatan berbahaya dan pseudosains yang semakin meningkat dari segi kategori, kuantiti dan kecanggihan.
5. Rakyat harus mendidik diri sendiri dan keluarga masing-masing untuk mengelakkan amalan kesihatan yang berbahaya dan produk kesihatan palsu atau meragukan.
6. KKM harus memberikan sokongan yang wajar dari segi perundangan dan/atau kewangan untuk kakitangan kesihatan yang mendidik dan meningkatkan kesedaran Rakyat terhadap isu-isu kesihatan dan amalan perubatan yang selamat. Rakan sekerja kami berhak mendapat perlindungan daripada ancaman dan tuntutan undang-undang yang berniat jahat.

MHC teguh menentang amalan kesihatan yang meragukan dan pseudosains. Perkara-perkara ini membahayakan kesihatan Rakyat. Kita mesti mempercayai ilmu yang berasaskan sains, bukti yang kukuh dan peraturan kerajaan yang wajar.

BERKHIDMAT UNTUK NEGARA.

Malaysian Health Coalition

49 organisasi and 19 individu

Senarai penuh boleh dirujuk di myhealthcoalition.org.

28 Oktober 2020